

ጳውሎስ ፕሊሲሲዮሳ አሳው ፃፊዳ ኪታ ጌሉዋ

ጳውሎስ ፕሊሲሲዮሳ አሳው ፃፊዳ ኪታይ ፃፊቴዳዌ፣ ማቀደኒያ ጊዲዋን ዳዒያ ሮሜን አሞዴቴዳ ፕሊሲሲዮሳ ጌቴቴያ ጋዲያን ዳዒያ አማኒያዋንቱሳ። ሃዋንቱ ጳውሎስ ኮይሮ አማንሴዳ ሺሺዳዋንታ። ኡንቱንቱ ሮሜ ጋዴ ዩሌታ ጊደ ዲራውኔ ቃሰካ ካሬ ጋዴ፤ ዩዳ ዋጋኒኔ አማኑዋን ዳሮፕ አዪና። ጳውሎሳ ቦላን ኡንቱንቱ ዳሮፕ ሃንቅቴዳ ጋሱካ ሃዋ (ኪት 16:20)። ሃ ኪታይ ፃፊቴዳዌ፣ ሃራ አማኒያ ኦሳንቻቱ ጳውሎሳ ቆፋ ጳልቂ ጳልቂዳ ዋዪሲያ ዋዲያናኔ ፕሊሲሲዮሳ አማኒያዋንቱ ጊደን ዴንዴዳ ዋርደ ቲሚርቴያ ጋሱዋን አ ዋዛናይ ዳሮ ካዮቲዳ ማዔዳ ዋዴኔ ቃሾ ጎሊያን ኢ ዳዒያ ዋዲያና። ጊደሺን፣ ጳውሎስ ዩሱሲ ኪሪሰቶሳ ሚኒሲዳ አማኒያ አሳ ጊዴዳ ዲራው። ሃ ኪታ ቦላን ቆንጨዳ ቤቴያዌ ናሺቻኔ ኩሜንላ አማኔቲያዋ።

ጳውሎስ ሃ ኪታ ፃፊዳ ኮይሮ ጋሱ አ ሜቱዋ ዋዴ አ ማዳናው ፕሊሲሲዮሳ አማኒያ አሳይ አሞታ አው ኪቴዳ ዲራው፣ ኡንቱንታ ጋላታናሳ። አ ቦላንካ ኡንቱንቱ ቦላንካ ዲማ ዲማ ሜቱ ጋኬዳዋ ጊደፕካ፣ ኡንቱንቱ ፃላና ማላኔ ኩሜንላ አማኔቲዳ ዳላና ማላ፣ ሃ ጋኬቴዳ ኢንጂያን ኡንቱንታ ማንሴሴ። አዩዋኔ ኦቶሩዋ ዲጊዴ፣ ዩሱሲ ኪሪሰቶሳ አሺኬቴላን ኡንቱንቱ ኩማና ማላ፣ ሚኒሲዳ ኡንቱንታ ሃሳዩሴዳ። ዩሱሲ ኪሪሰቶሳና ኢቲፕ ጊዴዳዋን ኡንቱንቱ ዳሜዳ ዳዑ ያሳ አጾ ከካቴላፕ ፑልቴዳዋኔ ኡንቱንቱ አማኑዋን አኬዳዋ ጊዲያዋፕ አቲን፣ አዩሁዳቱዋ ዋጋቱዋ ፖሊያዋን ቤቴዳዋ ጊዴናዋ ኡንቱንታ ሃሳዩሴ። ዩሱሲ ኪሪሰቶሳና ኢቲዋ ጊዲዳ ዳዒያ ኡባቶ ያሳይ ኢሚያ ሳርቴላባኔ ናሺቻባ ኡንቱንቱሲ ፃፊ።

ሃ ኪታይ ኤሬቲያዊ ናሺቻ፣ አማኔቲያዋ፣ ኢቲፕቴላኔ ኪሪሰቲና አማኑዋኒኔ ዳዑዋን ሚኒዳ ዳዒያዋ ጌሺዳ ቤሲያዋና። ሃዋ ቦላካ ጉጂዳ፣ ጳውሎስ ፕሊሲሲዮሳን ዳዒያ አማኒያ አሳቱዋ ሰቂያ ዋልቃማ ሰቂዋ ቆንጨሴ።

ሺምፓቱዋ ኡባቱዋሲ ኢሜቴዳ ቃንላ ቆፋቱዋ

- ጌሉዋ (1:1-11)
- ጳውሎስ ዳዊት ዳዊት ሃኖታ (1:12-26)
- ኪሪስቲና ዳዊት ሌሚሱዋ (1:27-2:18)
- ዓምቶሳሲኔ ኤጳፊሮዲቱሳሲ ዳዊት ቆፋ (2:19-30)
- አማኑዋ ኤቁቲያዋንቱፔ ናጌታና ማላ ኦዴቲዳዋ (3:1-4:9)
- ጳውሎስ ፕሊዲሲዮሳ አማኒያዋንቱሲ ሺሹዳ ጋላታኔ ማቁዋ (4:10-20)
- ዉርሴላ ቁቲያ (4:21-23)

ሳርታ

1 ኑኒ ዩሱሲ ኪሪስቶሳ ኦሳንቻቱ ጳውሎስኔ ዓምቶሳ፡ ኪሪስቶሳ ዩሱሳን ዳዊትያዋንቶ፡ ፕሊዲሲዮሳ ጊያ ካታማን ዳዊትያ ጌሻቶ ኡባቶ፡ አማኒያዋንታ ካሌሌያዋንቶኔ ማዲያዋንቶ ሃ ደቢዲቢያ ፃፊቶ።

2 ኑ አዉዋ ያሳፔኔ ጎዳ ዩሱሲ ኪሪስቶሳፕ ኦጾ ከካቴላዩኔ ሳርቲላይ ሂንቴንቶ ጊዶ።

ጳውሎስ ዋሴዳ ጋላታ ዋሳ

3 ታኒ ሂንቴና ሃሳዪያ ዋዴ ኡባን ታ ያሳ ጋላታይ። 4-5 ሂንቴ ከዩሮ ጋላሳፔ ሃኖ ጋካናው፡ ሚሺራቹዋ ቃላ ኦዲያዋን ታና ማዴዳ ዲራው፡ ታኒ ኡባ ዋዴ ሂንቴንቶ ኡባው ናሼቻን ያሳ ዋሳይ። 6 ቃሲ ሂንቴንቱ ጊደን ሎዖ ኦሱዋ ደሚዳ ያሳይ፡ ኪሪስቶሲ ዩሱሲ ሲሚያ ጋላሳይ ጋካናው ፖላናዋ ኤራይ።

7 ታኒ ሂንቴንቶ ኡባው ሄዋዲን ቆፓናው ቤሴ፤ አዩሲ ጎፔ፡ ታኒ ሂንቴና ኡባ ዋዴ ሃሳያይ። ሃዲ ታኒ ቃሹዋን ዳዊትያዋንኔ ዋንጋላው ዋቲቲያዋን፡ ቃሲ ዋንጋላ ሚኒሳ ኤሲያዋንኔ፡ ያሳይ ታው ቃዴዳ ቃዳ ሂንቴካ ታናና ጊሺ አኬዲታ። 8 አዩሲ ጎፔ፡ ታኒ ሂንቴና ኡባቱዋ ኪሪስቶሲ ዩሱሳፔ ዩያ ሲቁዋን አይ ከና ሲቁንቶ፡ ያሳይ ታው ማርካ።

9-10 ቃሲ ታኒ ሂንቴንቶ ያሳ ዋሲያዌ ሃዋ፤ ሎዖባ አያኔካ ደራናው ሂንቴንቱ ዳንዳያናዲኒኔ፡ ቃሲ ሂንቴንቱ ሲቁ ቱሙ፡ ኤራቴላናኔ አከካ ኡባና አቲፔ ጉጂ ጉጂ ዲጫናዲን፡ ያሳ ዋሳይ፤ ያቲዳ ኪሪስቶሲ ሲሚያ ጋላሳን ሂንቴንቱ ሱሬኔ ፖኩ ባይናዋንታ ጊዳና። 11 ቃሲ ሂንቴንቱ ሺዎፑካ ያሳ ቦንቾኔ ጋላታው ዩሱሲ ኪሪስቶሳ ባጋና ቤቲያ ጂሎቴላ አይፊያ አዩፋና።

ጳውሎስ ቃሹ ዋንጋላይ አካናዋ ዲጊቤና

12 ታናዳን ያሳ ካሊያዋንቶ፡ ሃ ታና ጋኬዳዌ ሚሺራቸዋ ቃላይ አካናዳን ቱሙ ማዴዳዋ ሂንቴንቱ ኤሪና ማላ ኮያይ።

13 ታኒ ኪሪሰቶሳ ዲራው ቃሼቴዳዋ፡ ካቲያ ጎሊያ ናጊያ ኡባቱኔ ሃዋን ዴዒያ ሃራቱ ኡባቱ ኤሪና። 14 ቃሲ ታኒ ቃሼቴዳዌ ኑ አሻቱዋ፤ ዳሪያዋንቱ ጎዳን ሎይሊ አማኔቲዴ፡ ያሳ ቃላ ያሺ ባይናን ካሴዋ፤ ፃሊዴ ኡዳናዳን ማዴዳ።

15 ቱሙ፤ ኢቱ ኢቱ ቃናቲያ ዲራወኔ ፓሉሚያ ዲራው፡ ኪሪሰቶሳዋ ኡዲና፤ ሺን ሃራንቱ ሎዎ አሙዋን ኡዲና። 16 ሃዋንቱ ያሳይ ታው ዋንጋላ ናጊያ አሱዋ አሜዳ ዲራው፡ ሲቂዴ ቃላ ኡዲና። 17 ሺን ዮኮንቱ ታኒ ቃሹዋን ዴዒሺን፡ ታ ቦላ ዋዪያ አሃናዋ ኡንቱንቶ ማላቲና፡ ባሪና ሲቂያ ዋልቃማ አሙዋን ኪሪሰቶሳዋ ኡዲና፤ ኣቲን፡ ዋዛና፤ ኡዲሲና።

18 አይኔ ባዋ፤ ማላቲሲያ ኦዶኔ ገዶ ዋይ ቱሙ ኦዶኔ ገዶ፡ አይ አጊያኒኔ ኪሪሰቶሳዋ ኡዶ፤ ታኒ ሄዋን ናሼታይ። ሲንፋናወካ ቃሲ ታኒ ናሼታይ። 19 አዪሲ ጎ፤ ታኒ ሂንቴንቱ ዋሳኒኔ ዬሱሲ ኪሪሰቶሳ አያና፤ ዪያ ማዴዋን አታናዋ ኤራይ። 20 ታ ዋልቃማ አሙኔ ያሳ፤ አካና ጋዴ ታኒ ናሼቻን ናጊያ ናጉ አዬ ጎ፤ ታኒ ፓፃ ዴዒናካ ዋይ ሃዪቁናካ ያዬናን፡ ካሴዋዳን ሃዒካ ታ ኩሜንፋ አሳቴላን ኪሪሰቶሲ ቦንቸታናዋ፤ ኣቲን፡ ታኒ ሃራይ አቶ አቲባንካ ዬላቴናን አታናሳ። 21 አዪሲ ጎ፤ ታው ዴዑ ኪሪሰቶሳ፤ ቃሲ ሃዪቁካ ታው ጎዳ። 22 ሺን ታኒ ፓፃ ዴዒያዋን ዳር ጎዲያዋ አላናዋ ጊዶ፤ ሃቃዋ ዶራኔንቶ ታው ኤሪቴና። 23 ታኒ ሃ ላዑ ዬዋቱዋን ሜቶታይ፤ ሃ ዴዑዋ፤ ሻኬታናወኔ ቃሲ ኪሪሰቶሳና አቲ፤ ዴዳናው አዋታይ፤ ኪሪሰቶሳና አቲ፤ ዴዒያዌ ኡባ፤ አዴዳ ዳር ሎዎባ። 24 ሺን ታኒ ሃዪቁያዋ፤ ሂንቴንቱ ዲራው ፓፃ ዴዒያዌ ሂንቴና ዳር ኮሺያዋ።

25 ሃዌ ቱማ ገዲያዋ ታኒ ጌሻዴ ኤራይ፤ ቃሲ አማኑዋን ሂንቴንቱ ዲጫናዳኒኔ ናሼታናዳን፡ ታኒ ሂንቴናና ኡባና ፓፃ ዴዳና። 26 ሄዋ ዲራው፡ ታኒ ሂንቴናና ላዔሉዋ ዪያ ዋይ፡ ኪሪሰቶሳ ዬሱሳና ሂንቴ ዴዒያ ዴዑዋን፡ ታባን ጨቁቲያባይ ሂንቴንቶ ዳራና።

27 ጊዶ፤ ሂንቴንቱ ሂንቴንቱ ሁጹው ኪሪሰቶሳ ዋንጋላው ቤሲያ ዴዑዋ ዴዒቴ፤ ታኒ ሂንቴና ባዴ ዋይ ቤዓና ቆዶና፡ ሂንቴንቱ አቲ ቆፋን ሚኒዴ ኤቆዳዋ፤ ቃሲ ዋንጋላ አማኖ አቲ ዋዛና ገዲዴ አቲ፤ ባዳቴያዋ ሲሳና። 28 ሂንቴ ሞርኬቱዋሲ አያንካ ያዮ፤ ሄዌ ኡንቱንቶ ኡንቱንቱ ባሻ ጲሺሴ፤ ሺን ያሳይ ሂንቴና ያኒሲያ ዲራው፡ ሂንቴንቶ አቶቴላ ጲሺሴ። 29 አዪሲ

ጎፔ፡ ኪሪሰቶሳው ኦሊያ ቃዳይ ሂንቴና ጋኬዳዌ ሂንቴንቱ ኣኒ ኣማናና ፃላላሳ ጊዴናን ኣ ዲራው ዋዪያካ ኣካናሳ።³⁰ ታኒ ካሴ ባዌቲሺን ሂንቴንቱ ቤዔዳዋ ማላ ባዌኔ ቃሲ ሃዒካ ታኒ ባዌቲያዋ ሂንቴንቱ ሲሲያዋ ማላይ ሂንቴና ጋኬዳ።

2

ኪሪሰቶሲ ባሬና ካዉሼዳዋ ሌሚሱዋ

1 ኪሪሰቶሳን ሂንቴንቱ ዴዒያ ዴዑ ሂንቴና ዋዛንሉ? ኣ ሰቁ ሂንቴና ማንሌሉ? ጌሻ ኣያናና ሂንቴንቶ ኢቲፔቴላይ ዴዒ? ሂንቴ ኢቱ ኢቱዋሲ ከከቴኔ ቃሬቲቴ? 2 ያቶፔ፡ ሂንቴንቱ ቆፋን፡ ሰቁዋን፡ ዋዛናኒኔ ቆፋ ፖሉዋን ኢቱዋ ጊዲዴ፡ ታና ፖሎ ናሹቹቴ።
3 ሂንቴና ሰቁያዋን ዋይ ጨቁታናው ኮዪያ ማላ ኣሙዋን ኢቲባኔ ኦሎፕቴ፤ ሺን ኢቱ ኢቱዋፔ ቶቃይ ያጊዴ ቆፔናን፡ ኢቱ ኢቱዋሲ ሂንቴንቱ ሁጲያ ካዉሺቴ። 4 ቃሲ ኢቱ ኢቱዋ ጎዒያዋ ኮያናፔ ኣቲን፡ ሂንቴንቱ ሁጲ ፃላላ ጎዒያዋ ኮዮፕቴ።

5 ኪሪሰቶሳ ዩሱሳን ዴዒያ ሃ ኣሺከቴላ ቆፋይ ቃሲ ሂንቴናንካ ዴዒናው ቤሴ።

6 ኢ ኡባ ዋዴ ያሳ ጊዲዴ ዴዒዳ፤ ሺን ኢ ዋልቃን ያሳ ከና ጊዲያ ማታይ ዴዒያዋ ቤሲያዋዳን ፓይዲቤና።

7 ሺን ኢ ባሬ ሹኒያን ኡባባ ኣጊዴ፡ * ኣይሊያ ሜዴታ ኣኬዳ፤ ቃሲ ኣሳ ማላቲዴ ቆንጨዳ።

8 ኢ ባሬና ካዉሼዳ፤ ሃይቆ፡ ኡባ ሃራይ ኣቶ፡ ማሰቃሊያ ቦላ ሃይቃናዉካ ኣዛዘቴዳ።

9 ሄዋ ዲራው፡ ያሳይ ኣ ሎይሉ ቶቁ ቶቁ ኦሌዳ፤ ቃሲ ሱንላ ኡባፔካ ኣጲያ ቶቃ ሱንላ ኣው ኢሜዳ።

10 ሄዋ ዲራው፡ ሳሉዋኒኔ ሳዓን ሳዓፔ ጋርሳን ዴዒያ ኡባይ ዩሱሳ ሱንላ ቦንቻናው ጉልባታና።

11 ቃሲ ኣሳይ ኡባይ ዩሱሲ ኪሪሰቶሲ ጎዳ ያጊዴ፡ ያሳ ኣዉዋ ቦንቻ ማርካታና።

ሃ ሳዓን ዴዒያ ኣሳሲ ፖዖ ጊዲያዋ

* 2:7 ኡባባ ኣጊዴ፡ ኢ ባሬና ሜላ ኡዴዳ ጉሳ። 2:10 ኢሳ 45:23

12 ህዋ ዲራው፡ ታ ዳባቶ፡ ታኒ ሂንቴናና ዳዒያ ዎዴ ኡባን ሂንቴንቱ ታው አዛዜቴዳዎዳን፡ ሃዒ ታኒ ሂንቴንቱ ማታን ዳዒና ዎዴካ፡ ሂንቴንቱ ካሴዎፔ አሊዴ ታው አዛዜታናው ቤሴ፤ ያሻቴላኒ ኮርሳን ሂንቴንቱ አቶቴላ ፖላናው አሊቴ። 13 አዪሲ ጎፔ፡ ያሳይ ሂንቴና ባሬው ኤኖ ገሳናዳኒኔ ቃሲ ኢ ቆፔዳዎ ሂንቴንቱ አላናዳን ሂንቴንቱ ገደን ኡባ ዎዴ አሊቴ።

14-15 ጌላኔ ናጋራንቻ አሳ ገደን ፖኩ ባይናዎንታ፡ ጌሻቱዋ፡ ያሳ ናናቱዎዳንካ ፖኩ ባይናዎንታ ገደቲ፤ ቃሲ ዙዙሜናን ዎይ ኢታባ ቆፔናን ኡባባ አሊቴ። ሄ አሳ ገደኒካ ሳሉዋን ፖዒያ ያለንቲያዳን ፖዒዳ፡ 16 ዴዑዎ ሚሺራቹዎ ቃላ ኡንቴንቶ አዲቴ፤ ሃ ዎዴ ታ ዳቡራዪኔ ታ ኡሱ ሜላ ጳዪቤናዎ ኤሬቴያ ዲራው፡ ከሪሰቶሲ ሲሚያ ጋላሲ ታኒ ሂንቴናን ጨቄታና።

17 ሃራይ አቶ ሂንቴንቱ አማኑ ያሳው ያርሺያ ያርሹዎ ቦላ ታ ሱላይ ኢሻ ያርሹዎዳን ጉኮፔካ፡ ታኒ ናሽታይ፤ ሂንቴናና ኡባና ኢቲፔ ናሽታይ። 18 ህዋዳን ሂንቴካ ቃሲ ናሽታናው ቤሴ፤ ታናና ኢቲፔ ናሽቲቴ።

ዲዎቶሲኔ ኤፓፊሮዲቶሲ አሌዳ አሱዎ

19 ሺን ታኒ ሂንቴንቱ ዴዑዎባ ሲሳዴ ናሽታናዳን፡ ዲዎቶሳ ሂንቴኮ ኤሌካ ዬዳናዎ ጎዳ ዬሱሳን አማኔታይ። 20 አዪሲ ጎፔ፡ ሂንቴንቱ ዴዑዎባው ዎዛናፔ ሂርጊያ አ ማላ አሳይ ሃራይ ኦኒኔ ታው ባዎ። 21 አዪሲ ጎፔ፡ ሃራቱ ኡባቱ ባሬንቱ ሁጴ ጎዳ ኮዪና፤ ዬሱሲ ከሪሰቶሳዎ ኮዪኪና። 22 ሺን ናዒይ ባሬ አቡ አሊያዎዳን፡ ዲዎቶሲ ታናና ኢቲፔ ገደዴ፡ ዎንጋላ አሱዎ አሌዳዎን፡ አማኔቲያ አሳ ገደያዎ ኤሪሴዳዎ ሂንቴንቱ ኤሪታ። 23 ህዋ ዲራው፡ ታኒ ዬዒ ሃኒያዎ ቤዒዳ፡ ኤሌካ አ ሂንቴኮ ዬዳና ጋዴ ቆፓይ። 24 ታኒ ታ ሁጴው ማታ ዎዲያን ሂንቴኮ ባናዎ ጎዳን አማኔታይ።

25 ሺን ታኒ ታ ኢሻ ኤፓፊሮዲቶሳ፡ ታናና ኢቲፔ ታ ባጋ ገደዴ አሌዳዎ፡ አሌቴዳዎኔ፡ ቃሲ ታና ማዲያዎን ሂንቴንቶ ከቴቲዴ አሌዳዎ ሂንቴኮ ከታናው ኮሺያዎ ቆፓዲ። 26 አዪሲ ጎፔ፡ ኢ ሂንቴና ኡባ ቤዒናው ላዎቴ፤ ቃሲ ኢ ሳኬቴዳዎ ሂንቴንቱ ሲሴዳ ዲራው፡ ባሬ ዎዛናን ዳሮ ሜቶቴ። 27 ኢ ቱሙ ሳኬቴዳ፡ ሃዪቂ አቴዳ፤ ሺን ያሳይ አው ቃሬቴዳ፤ አ ፃላላው ገዴናን ካዩ ካዩዎ ቦላ ጉጃቴናዳን፡ ታዉካ ቃሬቴዳ።

28 ሲሚ ሂንቴንቱ ላዒንሉዎ አ ቤዒዴ ናሽታናዳን፡ ታዉካ ታ ዎዛና ካዩ ኢርፃናዳን፡ ታኒ ኤሌካ አ ሂንቴኮ ዬዳና። 29 ህዋ ዲራው፡ ጎዳን ዳዒያ ኢሻዳን፡ ኩሜንላ ናሽቻን አ ሞኪቴ፤ ቃሲ

አ ማላቲያ አሳ ኡባካ ቦንቸቱ። 30 አዪሲ ጎፔ፣ ሂንቴንቱ ሂንቴንቱ ሁጳው ታና ማዳና ዳንዳዬና ማዲዋ ማዳናው፣ ኪሪሰቶሳ ኦሱዋ ዲራው፣ ባሬ ሽምቸዋ ሽኔኮ ጊዳ፣ ሃዪቂ አቴዳ።

3

ቱሙ ዲሎቴላ

1 ወርሴላን፣ ታናዳን ያሳ ካሊያዋንቶ፣ ጎዳይ ሂንቴንቶ ናሽቻ አሞ። ታኒ ካሴ ፃፊዳዋ ዛሬላዴ ፃፊያዌ ታና ዋዪሴና፤ ቃሲ ሄ ፃፊያዌ ሂንቴና ናጋና።

2 ኢታባ ኦሊያዋንቱ፣ ሄ ካናቱዋ ኤሻይ ዳዒያዋንቱ፣ ቃፃራይ ኮሼ ጊያ አሳቱዋ፣ ናጌቲ። 3 አዪሲ ጎፔ፣ ኮኒ ያሳ ጌሻ አያናን ያሳው ጎዪኒያ ዲራውኔ ኑ ዳዑዋን ጎዳ ኪሪሰቶሳ ዬሱሳን ናሽቲያ ዲራው፣ ቱሙ ቃፃራ ቃፃሬቴዳዋንታ፤ አሳቴላ ቦላ ኦሴቲያዋን አማኖኮ።

4 ቃሲ ታው ታ ሁጲያንካ ታ አሳቴላን አማኔቲያዌ ዳዔ። አይ አሳይኔ ባሬ አሳቴላን አማኔቲያዌ ባሬው ዳዔ ጊዳ ቆፖ፣ ታኒ አፔ ሎይላ አዳይ። 5 ታኒ ዬሌቶዴፔ ሆሰፑንላ ጋላሳን * ቃፃሬታዲ። ታኒ ዬሌታን ኢሰራዔሊያ፤ ቢኒያማ ዛሬ፤ ዋላካይ ባዪና አዪሁዳ አሳ። አዪሁዳ ሂጊያ ናጊያዋን ጊዶ፣ ታኒ ፓሪሳዌ፤ 6 አዪሁዳ አማኖ ሴላ ጊዶ፣ ታኒ አማኒያዋንታ ዋዪሳዲ፤ ኢቲ ኡራይ ሙሴ ሂጌው አዛዜቲዳ ዲሊያዋ ባጋ ጊዶ፣ ታናን ፖኮባይ ቤቲቤና።

7 ሺን ታና ጎዒያ ሄ ኡባባ ኪሪሰቶሳ ዲራው ባዬዳዋዳን ፓይዳይ። 8-9 ቱማካ፣ ሄዋንቱ ፃላላ ጊዳና፤ ታኒ ታ ጎዳ ኪሪሰቶሲ ዬሱሳ ኤሪያዌ ኡባባ፣ ሎይሊ አዲያ ዲራው፣ ኡባባ ታና ሙሊካ ጎዒናዋዳን ፓይዳይ፤ ታኒ አ ዲራው ኡባባ ዬጋ ባሻዲ። ኪሪሰቶሳ ዳማናውኔ አናና ዳዓናው ኡባባ ዋራ ኦሌዳዋዳን ፓይዳይ፤ ታኒ ሙሴ ሂጌው አዛዜታዳ ዳሚያ ታ ሁጳ ዲሎቴላይ ታው ባዋ። ኪሪሰቶሳ አማኒና፣ ያሳይ አሚያ ዲሎቴላይ፣ አማኑዋን ያሳ ማታፔ ዪያ ዲሎቴላይ ታው ሃዒ ዳዔ። 10-11 ታኒ ኪሪሰቶሳኔ አ ዳንዲዋ ዋለቃ ኡራናው ኮያይ፤ ያታዳ ታኒ ታ ሁጳው ሃዪቂዋ፣ ዳንዳና ያጊያዋን፣ አ ዋዪያ አናና ዋዪታናውኔ አ ሃይቁዋን አ ማላታናው አሞታይ።

ጋኪያሳ ጋካናው ዋዪያዋ

* 3:5 ታኒ ዬሌቶዴፔ ሆሰፑንላ ጋላሳን፣ ሃዌ አዪሁዲያ አቱማ ናናይ ዬሌቶዴፔ ሆሰፑንላ ጋላሳን ቃፃሬቲያዋ ቤሴ።

12 ታኒ ሃዒ ዴማ ዲጋዲ ዋይ ታናን ባሊ ባዋ ጊክ። ሺን ኪሪሰቶሲ ዩሱሲ ታና ባሬው ኦሌዳ ዋይታ ዴማና ጋይ ኤሌላይ።
 13 ታናዳን ያሳ ካሊያዋንቶ፡ ታኒ ሄዋ ዴማ ዲጋዲ ጋይ ቆፒኬ፤ ሺን ታኒ ኢቲባ ኦላይ፤ ታፔ ጉዬና ዴዒያዋ ዶጋይ ሲንላን ዴዒያዋ ኦይቃናው ዋዴታይ። 14 ያሳይ ኪሪሰቶሲ ዩሱሳ ባጋና ቦላ ዴዐ-ዋሲ ያሲያ ዋይታ ኦካናው፡ ታ ጋካናው ዋዳይ።

15 ሲሚ ኩኒ ኦያናን ሚኔዳዋንቱ ኡባቱ ሃዋ ቆፓናው ቤሴ፤ ቃሲ ሂንቴፔ ኦማሪዳዋንቶ ኦያኒኔ ዲማ ቆፋይ ዴዖፔ፡ ሄዋካ ያሳይ ሂንቴንቶ ቆንጨሳና። 16 ጊዶፔካ፡ ኩኒ ሃኖ ጋካናው ዴዒዳ ማሪዳን፡ ኦኔ ሲንላው ሄ ማራ ካሎይቴ።

17 ታናዳን ያሳ ካሊያዋንቶ፡ ታኒ ሃኒያዋዳን ሃኒቴ። ኩኒ ሃንቴንቶ ሌሚሱዋ ጊዴዶ፤ ሄዋዳን ሃንቴካ ኩኒ ሃንቴንቶ ሌሚሱዋ ጊዴዳ ማራ ካሊያዋንታ ኦኩኪቴ። 18 ኦዩሲ ጎፔ፡ ታኒ ሄዋ ሃንቴንቶ ካሴ ጮራቶ ኦዳዲ፤ ቃሲ ሃዒ ለዔሉዋካ ኦሮዓይ ሃንቴንቶ ኦዳይ፤ ኪሪሰቶሲ ማሰቃሊያ ቦላ ሚሲማሪያን ዲሽቴይ ሃዩቁዳዎ ባሬንቴ ሽምፑ ባሬና ሞርኬ ኦሌዳ ዳር ኦሳቱ ዴዒኖ። 19 ኡንቴንቱ ዉርሴላይ ባሻ፤ ኡንቴንቱ ኡሉ ኡንቴንቶ ያሳ፤ ዩላታናው ቤሲያዋን ኡንቴንቱ ኦቶሬቲኖ፤ ቃሲ ሃ ሳባባ ያላላ ቆፒኖ። 20 ኦዩሲ ጎፔ፡ ኩ ቢታይ ሳሉዋና፤ ኩኒ ቃሲ ሳሉዋፔ ያና ኩና ኦሺያ ጎዳ ዩሱሲ ኪሪሰቶሳ ናጌቶ። 21 ኪሪሰቶሲ ኡባባ ባሬፔ ጋርሳን ዋላናው ዳንዳዩያ ባሬ ዋልቃን፡ ኩ ዳቡራንቻ ኦሳቱላ ላሚዴ፡ ባሬ ቦንቾ ኦሳቱላ ማላቲሲዴ ኦላና።

4

ዉርሴላ ዘሪያ

1 ታናዳን ያሳ ካሊያዋንቶ፡ ታኒ ሲቂያዋንቶ፡ ላሞቲያዋንቶ፡ ታና ናሽቲያዋንቶ፡ ታና ዶቁ ኦሊያዋንቶ፡ ታ ዳባቶ፡ ሲሚ ጎዳን ሃንቴንቱ ሚኒ ኤቃናው ቤሴ።

2 ኤዎይኔ ሲንግኬ፡ ሃንቴንቱ ላዑካ ቆፋን ኢቱዋ ጊዲዴ፡ ጎዳን ዴዳናዳን፡ ታኒ ሃንቴና ዘራይ። 3 ቃሲ ታናና ኦሊያ ኦማኔቴዳዎ፡ ኔኒ ሃ ማጫ ኦሳቱዋ ማዳናዳን፡ ታኒ ኔና ዋሳይ፤ ኦዩሲ ጎፔ፡ ኡንቴንቱ ታናናኔ ኡንቴንቱ ሱንላይ ያሳ ዴዐ-ዋ ማዳን * ዓፌቴዳ ቃሊሚንያሳና ቃሲ ታናና ኢቲፔ ኦሊያ ሃራቱዋ ኡባና ዋንጋላ ኡባሳ ጋላናው ዳቡራዲኖ።

* 4:3 ያሳ ዴዐ-ዋ ማዳን፡ ያሳ ኦሳ ሱንላይ ዓፌቴያ ማዳ።

4 ጎዳና ሂንቴንቱ ዳዒያ ዳዑዋን ኡባ ዎዴ ናሼቲቲ፤ ታኒ ሃዎ ጉጃዴካ ጋይ፤ ናሼቲቲ።

5 አሳይ ኡባይ ሂንቴንቱ አሽኬቴላ ኤር፤ ጎዳይ ማታን ያና።

6 ያሳ ሂንቴንቱ ዎሲያ ዎሳ ኡባን ኣ ሎይሌ ጋላቲዴ፤ ሂንቴና ኮሺያዎ ኡባው ዎሲቲ፤ ኣቲን፤ ኢቲባወካ ሂርጎፕቲ። 7 ቃሲ አሳ ኤራቴላ ኡባ፤ ኣጂያ ያሳ ሳርቴላይ ሂንቴንቱ ዎዛና፤ ሂንቴንቱ ቆፋ ጎዳ ዬሱሲ ኪሪሰቶሳ ባጋና ናጋና።

8 ወርሴላን፤ ታናዳን ያሳ ካሊያዎንቶ፤ ሂንቴንቱ ዎዛናን ሎዎባ፤ ጋላቲሲያዎ ቆፕቲ፤ ቱማ ጊዲያባ ኡባ፤ ቦንቹሲያዎ ኡባ፤ ባዪዙዎ ጊዴናባ ኡባ፤ ጌሻባ ኡባ፤ ሲቁዎ ኡባ፤ ሱሬ ጊዲያባ ኡባ ቆፕቲ። 9 ሂንቴንቱ ታፔ ታማራዳዎ፤ አኪዳዎ፤ ሲሲዳዎ፤ ቤዔዳዎ ኡባ ኦሊቲ፤ ቃሲ ኮሲ ሳርቴላ አሚያ ያሳይ ሂንቴናና ኢቲ፤ ጊዳናዎ።

ባሬው ኪቴቲዳ አዎታው ጳውሎሲ ጋላቲዳዎ

10 ሺን ዳር ዎዲያፔ ጉዪያን፤ ሃዒ ሂንቴንቱ ታዎ ላዒንሉዎ ቆፓናው ደማዳ ዲራው፤ ታኒ ጎዳን ሎይላ ናሺታይ፤ ታው ቆፓናው ሂንቴንቶ አንጃቴናን አጃዳዎ፤ ኣቲን፤ ታው ቆፋ ቆፕታ። 11 ታኒ ሃዎ ታና ሜቲዳ ዲራው ጊኬ፤ አዪሲ ጎፔ፤ ታው ዳዒያባይ ታው ጊዳና ተ ጊያዎ ታኒ ታማራዲ። 12 ታኒ ሜቶቲዴ ዎቲ ዳዒንቶ ኤራይ፤ ቃሲ ዱሪቲዴ ዳዒያዌካ ኣዬንቶ ኤራይ፤ ሃቃን ጊዲናካ አወዴ ጊዲናካ፤ ታኒ ካሉዋ፤ ኮሻ ቃሲ ፓጫ፤ ፓላሃ ታማራዲ። 13 ኪሪሰቶሲ ታው አሚያ ዎልቃን፤ ኡባባ ኦላናው ታኒ ዳንዳያይ።

14 ጊዶፔካ፤ ሂንቴንቱ ታ ሜቲዳ ታናና ሜቶቲዴ ዳር ሎይሌዲታ፤ 15 ፕሊ.ጲ.ሲ.ዮ.ሳ አሳው፤ ዎንጋላ ሚሺራቹ ኮይር ሂንቴ ጊዶን ኦዴቲዳ፤ ሺን ታኒ ማቂዶኒያፔ ኬሴዳ ዎዴ፤ ታና አማኒያ ሂንቴንቱ ኣቲን፤ ሃራይ ማዲቤናዎ ሂንቴንቱ ሂንቴንቱ ሁጳው ኤሪታ፤ ቃሲ አሚያባንካ አኪያባንካ ሂንቴ፤ ኣቲን፤ ሃራይ ታና ማዲቤና። 16 አዪሲ ጎፔ፤ ታና ሜቲ ኮይቁዳ ዎዴ፤ ሃራይ አቶ ታኒ ቴሴሎንቁያን ዳዒሺንካ ታና ዛሪ ዛሪዴ ማዳዲታ። 17 ታኒ ሂንቴዎ ቦላ ሃራባይ ጉጃታናዎ ኮዪያዎ፤ ዎዲያዎ ኣቲን፤ ዎዲታ ያላላ ኣካናው ኮዪኬ።

18 ሺን ታኒ ሂንቴንቱ አሚያዎ ኡባ ኣካዲ፤ ቃሲ ታው ፓላሂዴ ጊዲያዌ ዳዒ። ሂንቴ ኪቴዳ ኡባባ ኤፓሪርዲቶሳ፤ ኣካዲ፤ ኮሺያ ኡባይ ታው ዳዒ። ሂንቴ ታው ኪቴዳ አሙ ያሳው ሳወዎ

† 4:11 ታው ዳዒያባይ ታው ጊዳና፤ ታው ዳዒያባን ታኒ ሸዎፓይ፤ ካላይ፤ ዎፕ ጋይ። 4:15 2ቆር 11:9 4:16 ከት 17:1

ቶሺኩ ጊያኔ ኢ ዶሲያ፡ ኣ ናሼቲያ ያርሹዋ ማላ። 19 ቃሲ ታ ያሳይ ባሬ ቦንቾ ዱሬቴላ ዳሩዋን ኪሪሰቶሲ ዬሱሳ ባጋና ሂንቴና ኮሺያዋ ኡባ ሂንቴንቶ ኢማና። 20 ኑ ያሳው፥ ኑ ኣዎ ሜጲናፔ ሜጲና ጋካናው ቦንቾ ጊዶ። ኣሜንዒ።

ዉርሴላ ሳርታ

21 ኪሪሰቶሲ ዬሱሳዋ ጊዲያ ያሳ ኣሳቱዋ ኡባቱዋ ሳር ጊቴ። ታናና ሃዋን ዴዲያ ኢሻቱ ሂንቴና ሳር ጊኖ። 22 ሃዋን ዴዲያ ያሳ ኣሳቱዋ ኡባቱ፥ ኡባፔካ ኣሊዴ ካቲያ ቄሳሬ ጎሊያን ዴዲያዋንቴ ሂንቴና ሳር ጊኖ።

23 ኑ ጎዳ ዬሱሲ ኪሪሰቶሳ ኣቶ ኬካቴላይ ሂንቴናና ጊዶ።

Ooratha Caaquwaa New Testament in Dawro (ET:dwr:Dawro)

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 21 Feb 2024 from source
files dated 29 Jan 2022
585b63ca-b8e6-55c8-bfef-10bdc95ad69c